



Anwar disambut orang ramai pada Penutup Program MADANI Rakyat Terengganu 2025 di Kuala Terengganu, semalam. (Foto BERNAMA)

BERITA HARIAN 13 JUL 2025 m/s: 2

Siri lawatan ke luar negara beri manfaat kepada rakyat

Anwar perjelas kunjungan ke Brazil buka peluang dagang dengan syarikat Malaysia

Oleh Mohd Nasaruddin Parzi
bhnews@bh.com.my

Kuala Lumpur: Datuk Seri Anwar Ibrahim menegaskan siri lawatan kerja ke luar negara yang disertainya adalah demi kepentingan perniagaan syarikat tempatan, sekali gus manfaatnya turut dirasakan oleh negara dan rakyat.

Perdana Menteri menjelaskan, ketika usianya bakal menjangkau 78 tahun bulan depan, bukan satu perkara yang digemarinya untuk kerap berjalan ke luar negara.

“Saya nak masuk (usia) 78 tahun bulan depan, ingat saya suka

berjalan ke sana, ke luar negara, ingat tidak letih? Sampai dari (lawatan ke) Brazil 24 jam (naik) kapal terbang.

“Tiga kali (ganda dengan) orang pergi Makkah jauhnya. Sampai rumah jam 3 pagi, jam 9 pagi saya buka rasmi persidangan (Menteri Luar) ASEAN.

“Terus perjumpaan dengan pimpinan ASEAN. Jam 2 petang mesyuarat Menteri Kabinet. Bukan saya pilih,” katanya dalam satu video ucapan dikongsi beliau di Facebooknya, semalam.

Ucapan itu disampaikan Anwar pada Majlis Perasmian Program MADANI Rakyat Terengganu 2025 di Kuala Terengganu, semalam.

Buka peluang baharu

Dalam video ucapan itu, Anwar menjelaskan kunjungannya ke Brazil pada Sabtu lalu bagi menghadiri mesyuarat BRICS, sebuah gabungan negara selatan yang dibentuk untuk tidak mahu tunduk kepada sesuatu kuasa besar.

“Yang buka dagang bersama kita. Brazil negara besar, dia bagi ruang pelantar minyak terbesar kepada PETRONAS. Sebab apa?

Sebab kita berkawan dengan dia. Siapa untung? PETRONAS. PETRONAS untuk siapa? Rakyat Malaysia.

“Dia bagi satu syarikat perkapalan di Peru tahun lalu dan di Brazil untuk kapal yang besar, harga hampir RM1 bilion.

“Untung siapa? Syarikat. Untungnya siapa? Dibawa balik ke Malaysia, pekerjaanya siapa? Majoriti rakyat Malaysia,” katanya.

Anwar sebelum ini memaklumkan, siri lawatan beliau ke Itali, Perancis dan Brazil sejak minggu lalu dan berakhir awal minggu ini membuka jaringan lebih luas kepada syarikat Malaysia untuk mengembangkan operasi ke pasaran antarabangsa.

Selain memperkukuh kerjasama dua hala, beliau berkata, lawatan itu membuka peluang baharu dalam usaha menarik pelaburan dan meningkatkan perdagangan Malaysia.

Hasil lawatan kerja tiga hari ke Itali, potensi pelaburan berjumlah lebih RM8 bilion berjaya dijana, manakala di Perancis, nilai potensi pelaburan dianggarkan RM4 bilion.